

16.5.2019

KENYATAAN MEDIA

oleh Dato' Ir. Jaseni Maidinsa,
Ketua Pegawai Eksekutif,
PBA Holdings Bhd (PBAHB) dan
Perbadanan Bekalan Air Pulau Pinang Sdn Bhd (PBAPP).

PALING PENTING, LINDUNGI ULU MUDA UNTUK MANFAAT 4.2 JUTA PENDUDUK

- **Ulu Muda harus diwartakan sebagai “Kawasan Tadahan Air Wilayah Utara” yang memberi manfaat kepada Perlis, Kedah dan Pulau Pinang.**
- **Pulau Pinang akan menyokong Kedah untuk mendapatkan pampasan Persekutuan. Perlis juga harus memberi sokongan yang sama.**
- **163,103 hektar hutan hujan Kompleks Hutan Simpan Ulu Muda mesti dilindungi sepenuhnya, dengan “sifar pembalakan”.**

PULAU PINANG, Khamis, 16.5.2019: Kedah harus mewartakan Ulu Muda sebagai kawasan tadahan air serantau untuk 3 negeri terlebih dahulu, dan kemudian wartakannya juga sebagai “taman negeri”.

Menurut laporan berita Berita Harian bertarikh 14.5.2019, Kerajaan Negeri Kedah berhasrat untuk mewartakan Ulu Muda sebagai “taman negeri”.

Terdapat banyak sebab munasabah untuk lindungi Ulu Muda:

- Ia habitat untuk beribu-ribu spesies flora dan fauna, termasuk hidupan liar yang terancam.
- Ekosistemnya membantu kepada keseimbangan iklim mikro di rantau ini.
- Ia boleh menjadi destinasi pelancongan mesra alam yang terbaik di utara Malaysia.



Walau bagaimanapun, nilai sebenar Ulu Muda adalah nilainya sebagai kawasan tadahan air serantau.

Hutan hujan Ulu Muda “menadah” air hujan untuk Perlis, Kedah dan Pulau Pinang. Lebih kurang 70% air mentah Perlis, 96% air mentah Kedah dan lebih 80% air mentah Pulau Pinang datangnya dari Ulu Muda.

Adalah dianggarkan kira-kira 4.2 juta orang* tinggal di Perlis, Kedah dan Pulau Pinang. Rakyat perlukan perkhidmatan bekalan air yang berterusan setiap hari. Pada tahun 2017, gabungan sumbangan KDNK 3 negeri utara adalah kira-kira RM139 bilion* (pada harga semasa).

Oleh itu, sila hitung nilai Ulu Muda dari segi bilangan nyawa manusia dan semua aktiviti sosio ekonomi yang disokongnya... dan bukan daripada segi “premium hutan” pembalakan.

PAMPASAN PERSEKUTUAN

Kedah perlu fokus kepada pewartaan Ulu Muda sebagai "Kawasan Tadahan Air Wilayah Utara" (NRWCA) untuk menampakkan nilainya kepada Kerajaan Persekutuan.

Dengan berbuat demikian, Kedah boleh mendapatkan pampasan Persekutuan yang adil untuk melindungi dan memulihara Ulu Muda.

Kerajaan Negeri Pulau Pinang dan Perbadanan Bekalan Air Pulau Pinang Sdn Bhd (PBAPP) bersedia dan akan menyokong Kedah dalam mendapatkan pampasan Persekutuan bagiewartakan dan melindungi Ulu Muda sebagai NRWCA. Perlis juga harus memberi sokongan yang sama.

Sila ambil perhatian bahawa anggaran hasil Kerajaan Persekutuan dari Perlis, Kedah dan Pulau Pinang adalah RM18.6 bilion** pada tahun 2017.

“SIFAR PEMBALAKAN” DAN PERLINDUNGAN SEPENUHNYA

Pewartakan Ulu Muda sebagai NRWCA bermaksud melindungi seluruh 163,103 hektar hutan hujan di Kompleks Hutan Ulu Muda.

Larangan pembalakan mestilah larangan sepenuhnya dan menyeluruh.



Mesti ada “sifar pembalakan” di Ulu Muda, tanpa pengecualian. Tidak perlu ada “Kawasan pengeluaran hutan” (hutan pengeluaran), atau mana-mana kawasan pembalakan yang dilesenkan oleh apa-apa nama lain, di Ulu Muda.

Jabatan Perhutanan Kedah mesti hentikan pengeluaran permit pembalakan di Ulu Muda; dan semua permit pembalakan terdahulu mestilah dianggap batal dan tidak sah.

Sebuah jabatan kerajaan mesti diberi kuasa untuk menguatkuasakan undang-undang untuk melindungi Ulu Muda, tanpa rasa takut atau pilih kasih. Pembiayaan untuk jabatan ini mungkin boleh diperoleh daripada pampasan Kerajaan Persekutuan yang dicadangkan.

PERLINDUNGAN KEKAL

Ulu Muda mesti dilindungi oleh undang-undang, sebagai NRWCA, secara kekal. Kepentingannya akan menjadi lebih ketara pada masa depan.

Penggunaan air di Pulau Pinang meningkat sebanyak 56.7%, daripada 536 juta liter sehari (MLD) pada tahun 1999 kepada 840 MLD pada 2018. Penggunaan di Perlis dan Kedah juga meningkat dengan ketara dalam tempoh 19 tahun yang lalu.

Permintaan air di semua 3 negeri akan terus berkembang, seiring dengan pertumbuhan penduduk dan peningkatan aktiviti sosio ekonomi.

Ulu Muda perlu dilindungi sekarang untuk memastikan kelestarian bekalan air di Perlis, Kedah dan Pulau Pinang pada masa akan datang. Nilainya sebagai aset bekalan air yang paling penting di utara Malaysia akan meningkat.

Dalam konteks ini, **pelaburan Kerajaan Persekutuan untuk memberi pampasan kepada Kedah untuk mewartakan Ulu Muda sebagai NRWCA adalah pelaburan yang baik.** Ia merupakan pelaburan untuk melindungi masa depan rakyat Perlis, Kedah dan Pulau Pinang; dan untuk memastikan sumbangan KDNK dan hasil cukai yang baik dari wilayah ini pada masa akan datang.



Terima kasih.

* Sumber: Jabatan Statistik, Malaysia.

** Sumber: "Anggaran Hasil Kerajaan Persekutuan 2018", Kementerian Kewangan, Malaysia. Anggaran 10.3% daripada hasil cukai persekutuan 2017 sebanyak RM180.194 bilion, berdasarkan gabungan sumbangan KDNK Perlis, Kedah dan Pulau Pinang pada tahun 2017.

Dikeluarkan oleh : Puan Syarifah Nasywa bt Syed Feisal Barakbah
Unit Komunikasi Korporat
Tel : 04-200 6607
Email : syarifah@pba.com.my